

## Christlicher Leser!



D solt billich wissen / Was Gott  
der Herr den Kindern Israel ernstlich  
durch Mosen hat gebieten lassen / do sie  
auff dem wege zum gelobten Lande gewe-  
sen/nemlich/sie solten nicht thun nach den  
Wercken des Landes *Aegypten*, dorin sie gewohnet het-  
ten/auch nicht nach der weise des Landes *Sanaan*/da-  
rein sie solten geführet werden / sondern sie solten nuh-  
mehr ihm dienen/ den er wer ihr rechter Gott/ vnd nach  
seinen heiligen Satzungen vnd Geboten solten sie le-  
ben: Gestalt sie gar wol wüsten/ wie er dieselben Hey-  
den wegen ihrer Heydnischen Grewel hätte her auß ge-  
stossen/ vnd das Land hette sie müssen außspeyen/ Vnd  
würden sie wieder anfangen nach ihrer weise/ vnd ihrer  
vorigen art zu leben/ solte es ihnen eben auch also erge-  
hen/ den er hette das Urtheil schon gesprochen: Wel-  
che diese (Heidnische) Grewel thun / derer  
Seelen sollen außgerottet werden von ihrem  
Volck. Levit : 18. 3. 28. 29. & 20. 22. 23.

Was nu Gott den Kindern Israel/ so er auß dem  
finstern *Aegyptenland* hatte geführet / vnd auß der rei-  
se zum gelobten Lande weren / durch seinen Diener/  
Moyssen hat befehlen lassen: Eben dasselbe hat er dir/  
vnd allen / so Christen wollen sein / im Newen Testa-  
ment/ durch seinen geliebten Sohn *Jesusum Christum*/  
vnd seine heilige Apostel auch sagen vnd ernstlich mel-  
den lassen/ Nemlich/ das/ nach dem Er vns auch auß  
dem finstern *Aegyptenland*/ auß dem blinden Heyden-  
thumb/ auß lauter Gnade/ ohne vnser verdienst/ wissen

A ii

vnd wil-